


陝西通志



第五十卷

名宦一

節鎮上

DS
793
S45S5
1735
v.50

陝西通志第五十卷

名宦一

牧宰字人切於父母矧古京兆扶翊左右容保教思近在腋肘膏澤淪肌甘棠頌久護羗捍圉司隸繩糾勛銘於旂碑載於口自昔編氓躋堂春酒紀爾循良長勵厥後作名宦志第二十四

節鎮上



南仲

周文王大夫

王命南仲往城于方出車彭彭旂旐央央天子命我城

彼朔方赫赫南仲玁狁于襄

詩經小雅

王殷王也南仲文王之屬方朔

方近玁狁之國也

毛傳

王使南仲爲將率往築城於朔方爲軍壘以

禦北狄之難

鄭箋

文王以殷王之命命南仲往城朔方南仲爲將率

得人歡心故戍役當築壘之時云天子命我築軍壘於朔方欲令

赫赫之南仲從此征獫狁於是而平除之能為戎役所美所以可

嘉也

孔疏

周

召公奭與周同姓姓姬氏成王時為三公自陝以西召公主之召公之治西方甚得兆民和巡行鄉邑有棠樹決獄政事其下自侯伯至庶人各得其所無失職者召公卒而民人思召公之政懷棠樹不敢伐歌詠之作甘棠之詩

史記燕世家

昔者周道之盛召伯在朝有

司請營召以居召伯曰以吾一身而勞百姓此非吾先君文王之

志也於是出就烝庶於阡陌隴畝之間而聽斷焉召伯暴處遠野

廬於樹下百姓大悅耕桑者倍力以勸歲大稔民給家足於是詩

人見召伯之所休息樹下美而歌之詩曰蔽芾甘棠勿剪勿伐召

伯所爰此之謂也

韓詩外傳

正義曰武王之時召公為西伯行政於南

土決訟於甘棠之下其教著明於南國愛結於民心故作是詩以

美之

孔疏。按朱子集傳云召伯循行南國以布文王之政是召公舍甘棠在文王時矣但據韓詩外傳先君文王云云應在

武王成王時也

尹吉甫

宣王大夫

文武吉甫萬邦為憲

詩經小雅

吉甫尹吉甫也有文有武憲

法也

毛傳

吉甫此時大將也

鄭箋

王征獫狁既出鎬方使吉甫逐之北

至太原之地王師所以得勝者以有文德武功之臣尹吉甫其才

畧可為萬國之法受命逐狄王委任焉故北狄遠去也

孔疏

成康既

沒周室寢衰獫狁內侵逼近京邑宣王命尹吉甫帥師伐之有功

而歸詩人作歌以叙其事

朱子集傳

方叔

宣王卿士

顯允方叔征伐獫狁

詩經小雅

方叔先與吉甫征伐獫狁

鄭箋

秦襄公

史失名

七年春西戎犬戎與申侯伐周襄公將兵救周戰甚力

有功周東徙雒邑襄公以兵送平王平王封為諸侯賜之岐以西

之地曰戎無道侵奪我岐豐之地秦能攻逐戎即有其地與誓封
爵之襄公於是始國十二年伐戎至岐卒生文公文公三年東獵
四年至汧渭之會乃卜居之占曰吉即營邑之十三年初有史以
紀事民多化者十六年文公以兵伐戎戎敗走於是文公遂收周
餘民有之地至岐岐以東獻之周五十年卒

史記秦本紀○按古者郡縣未設列爵分

土封建亦郡縣也秦自襄公以後建國西藩
比於節鎮穆公孝公霸圖再啓亦以並列焉

秦繆公

名任好

立四年迎婦於晉晉獻公滅虞虜其大夫百里奚以爲

繆公夫人媵奚亡走宛楚鄙人執之繆公聞奚賢請以五羖羊皮
贖之授之國政號曰五羖大夫奚讓曰臣不及臣友蹇叔賢於是
繆公使人厚幣迎蹇叔以爲上大夫三十二年使孟明視西乞術
及白乙丙將百里奚蹇叔二人哭之秦兵遂東將襲鄭晉襄公遮
秦兵於殽擊之大破秦軍三十六年繆公復益厚孟明等使將兵

伐晉以報殽之役晉人皆城守不敢出於是繆公乃誓於軍以申

思不用蹇叔百里奚之謀故作誓以記過君子聞之曰秦繆公之

與人周也卒得孟明之慶三十七年用由余謀伐戎益國十二開

地千里遂霸西戎天子使召公過賀繆公以金鼓史記秦本紀五殺大

夫之相秦也勞不坐乘暑不張蓋行於國中不從車乘不操干戈

功名藏於府庫德行施於後世五殺大夫死秦國男女流涕童子

不歌謠春者不相杵此五殺大夫之德也戰國策文公元年殽之役

晉人既歸秦帥秦大夫及左右皆言曰是敗也孟明之罪也必殺

之秦伯曰是孤之罪也復使為政二年秦孟明視帥師伐晉以報

殽之役戰於彭衙秦師敗績秦伯猶用孟明孟明增修國政重施

於民三年秦伯遂霸西戎左傳

秦孝公名渠梁立周室微諸侯力政爭相併秦僻在雍州不與中國諸

侯之會盟孝公於是布惠振孤寡招戰士明功賞下令國中曰昔我繆公自岐雍之間修德行武東平晉亂西霸戎狄廣地千里天子致伯諸侯畢賀往者國家內憂未遑外事三晉攻奪我河西地諸侯卑秦醜莫大焉寡人常痛於心賓客群臣有能出奇計強秦者吾且尊官與之分土衛鞅聞是令下西入秦說孝公變法修刑內務耕稼外勸戰死之賞罰孝公善之卒用鞅法百姓苦之居三年百姓便之十九年天子致伯二十年諸侯畢賀

史記秦本紀

秦

蒙恬其先齊人始皇二十六年因家世得爲秦將攻齊大破之拜爲內史秦已并天下乃使蒙恬將三十萬衆北伐戎狄收河南築長城因地形用險制塞起臨洮至遼東延袤萬餘里於是渡河據陽山逶蛇而北暴師於外十餘年居上郡威振匈奴始皇甚尊寵蒙

氏信任賢之

史記本傳

漢汲黯字長孺濮陽人治官理民好清靜擇丞史而任之公孫弘爲丞相言上曰右內史界部中多貴人宗室難治非素重臣不能任請徙汲黯爲右內史爲右內史數年官事不廢渾邪王率衆來降漢發車二萬乘縣官無錢從民貰馬民或匿馬馬不具上怒欲斬長安令黯曰長安令無罪獨斬黯民乃肯出馬且匈奴降漢漢徐以縣次傳之何至令天下騷動乎上默然及渾邪至賈人與市者坐當死者五百餘人黯請問見曰渾邪率數萬之衆來降虛府庫賞賜發良民侍養譬若奉驕子愚民安知市買長安中物而文吏繩以爲闌出財物於邊關乎陛下以微文殺無知者五百餘人是所謂庇其葉而傷其枝者也上默然不許後數月免官

史記本傳○按漢因秦制

初設二內史繼置三輔以治京畿其祿位視九卿唐京兆亦如之漢世雖司隸督察三輔而京兆馮翊扶風非司隸屬官舊志與外郡牧守分編各府屬位置殊未合

兒寬千乘人張湯爲御史大夫舉侍御史見上語經學上說之擢爲中大夫遷左內史寬勸農業緩刑罰理獄訟卑體下士務在於得人心擇用仁厚士推情與下不求聲名吏民大信愛之奏開六輔渠定水令以廣溉田收租稅時裁闊狹與小民相假貸以故租多不入後有軍發左內史以負租課殿當免民間皆恐失之大家牛車小家擔負輸租經屬不絕課更以最漢書本傳

王訢濟南人爲被陽令繡衣御史暴勝之薦訢徵爲右輔都尉守右扶風上數出幸安定北地過扶風宮館馳道修治供張辦武帝嘉之駐車拜訢爲真視事十餘年漢書本傳

雋不疑字曼倩渤海人昭帝即位擢京兆尹京師吏民敬其威信

行縣錄囚徒還其母輒問不疑活幾何人不疑多所平反母喜笑
爲飲食語言異於他時或亡所出母怒爲之不食故不疑爲吏嚴
而不殘久之以病免終於家

漢書
本傳

趙廣漢字子都涿郡蠡吾人爲陽翟令以治行尤異遷京輔都尉守
京兆尹新豐杜建爲京兆掾素豪俠賓客爲姦利廣漢聞之先風
告建不改於是收案致法宗族賓客謀欲篡取廣漢盡知其計議
主名起居使吏告曰若計如此且并滅家令數吏將建棄市莫敢
近者京師稱之遷潁川太守本始二年復用守京兆尹滿歲爲真
廣漢爲人強力天性精於吏職尤善爲鈎距以得事情郡中盜賊
閭里輕俠其根株窟穴所在及吏受取請求銖兩之姦皆知之長
安少年數人會窮里空舍謀共劫人富人蘇回爲郎二人劫之廣
漢將吏到家自立庭下使長安丞龔奢叩堂戶曉賊曰京兆尹趙

君謝兩卿無得殺質此宿衛臣也釋質束手得善相遇二人驚愕
又素聞廣漢名即開戶出下堂叩頭廣漢送獄勅吏謹遇至冬當
出死豫爲調棺給歛葬具告語之皆曰死無所恨廣漢嘗記召湖
都亭長湖都亭長西至界上亭長戲曰至府爲我多謝問趙
君亭長既至廣漢與語畢謂曰界上亭長寄聲謝我何以不爲致
問還爲吾謝界上亭長勉思職事有以自效京兆不忘卿厚意其
發姦摘伏如神皆此類也長老傳自漢興以來治京兆者莫能及
廣漢好用世吏子孫新進年少者見事風生無所回避率多果敢
之計終以此敗廣漢雖坐法誅爲京兆尹廉明威制豪彊小民得
職百姓追思歌之至今

漢書本傳

陽城侯德字路叔

楚元王交孫

有智畧地節中封陽城侯寬厚好施生每

行京兆尹事多所平反

漢書楚元王傳

尹翁歸字子兄河東平陽人徙杜陵治東海以高第入守右扶風滿
歲爲真選用廉平疾姦吏以爲右職接待以禮好惡與同之其負
翁歸罰亦必行治如在東海故迹姦邪罪名亦縣縣有名籍盜賊
發其比伍中翁歸輒召其縣長吏曉告以姦黠主名教使用類推
迹盜賊所過抵類常如翁歸言無有遺脫緩於小弱急於豪彊豪
彊有論罪輸掌畜官使斫莖責以員數不得取代不中程輒笞督
極者至以鈇自剄而死京師畏其威嚴扶風大治盜賊課常爲三
輔最翁歸爲政雖任刑其在公卿之間清潔自守語不及私然溫
良嗛退不以行能驕人甚得名譽於朝廷視事數歲元康四年病
卒家無餘財天子賢之詔賜翁歸子黃金百斤以奉其祭祠

漢書本傳

蓋寬饒字次公魏郡人宣帝擢爲司隸校尉刺舉無所回避小大輒
舉公卿貴戚及郡國吏繇使至長安皆恐懼莫敢犯禁京師爲清

寬饒為人剛直高節志在奉公家貧奉錢月數千半以給吏民爲耳目言事者身爲司隸子常步行自戍北邊公廉如此然深刻喜陷害人在位及貴戚人與爲怨又好言事刺譏奸犯上意上以其儒者優容之然亦不得遷

漢書本傳

馮野王字君卿

父奉世上黨潞人徙杜陵

受業博士通詩年十八上書願試守長

安令宣帝奇其志後遷櫟陽令徙夏陽令元帝時爲左馮翊而池

陽令並素行貪汙輕野王外戚年少治行不改野王部督郵殺祠

趙都案驗得其主守盜十金罪收捕並不首吏都格殺並家上書

陳寃事下廷尉都詣吏自殺以明野王京師稱其威信遷大鴻臚

數年出爲上郡太守病免賜告歸杜陵年老終於家立字聖卿

野王

弟通春秋竟寧中以王舅出爲五原屬國都尉數年遷五原太守

徙西河上郡立居職公廉治行畧與野王相似而多知有恩貸好

為條教吏民嘉美野王立相代為太守歌之曰大馮君小馮君兄弟繼踵相因循聰明賢知惠吏民政如魯衛德化均周公康叔猶

二君

漢書馮奉世傳

諸葛豐字少季琅邪人以明經為郡文學名特立剛直舉侍御史元帝擢為司隸校尉刺舉無所避京師為語曰間何闊逢諸葛上嘉其節加秩光祿大夫時侍中許章以外屬貴幸不奉法度賓客犯事與章相連豐欲奏其事適逢許侍中私出豐駐車舉節詔章曰下欲收之章迫窘馳車去豐追之許侍中得入宮門自歸上豐亦上奏於是收豐節司隸去節自豐始是後言益不用徙城門校尉

漢書本傳

鄭昌字次卿泰山剛人好學明經通法律政事為右扶風京師稱之

漢書鄭弘傳

王尊字子贛涿郡高陽人初元中舉直言遷號令轉守槐里兼行美陽令事春正月美陽女子告假子不孝曰兒常以我為妻詬笞我尊聞之遣吏收捕驗問辭服尊曰律無妻母之法聖人所不忍書此經所謂造獄者也尊於是出生廷上取不孝子縣磔著樹使騎吏五人張弓射殺之吏民驚駭後上行幸雍過號尊供張如法而辦後免歸復為郿令為高陵令數月以病免會南山群盜音宗等數百人為吏民害拜故弘農太守傅剛為校尉逐捕歲餘不能禽或說大將軍鳳獨選賢京兆乃可於是鳳薦尊守京輔都尉行京兆尹事旬月間盜賊清遷光祿大夫守京兆尹後為真凡三歲坐免吏民多稱惜之

漢書本傳

宣字子佩淮陽夏人張禹薦宣經明有成重可任政事

石扶風遷廷尉

漢書本傳

王章字仲卿泰山鉅平人少以文學爲官成帝立遷司隸校尉大臣
貴戚敬憚之王尊免後代者不稱職章以選爲京兆尹時大將軍
王鳳輔政章爲鳳所舉非鳳專權不親附鳳會日有蝕之章奏封
事召見言鳳不可任用上初納章言後不忍退鳳遂爲鳳所陷初
章爲諸生學長安獨與妻居章疾病無被卧牛衣中與妻決涕泣
其妻呵怒之曰仲卿京師尊貴在朝廷人誰踰仲卿者今疾病困
厄不自激卬乃反涕泣何鄙也及爲京兆欲上封事妻又止之曰
人當知足獨不念牛衣中涕泣時耶章曰非女子所知也書遂上
果下廷尉獄章爲京兆二歲死不以其罪衆庶冤紀之

漢書
本傳

宣字贛君東海郯人大將軍王鳳薦爲長安令治有名以明習文
法守左馮翊滿歲稱職爲真始高陵令楊湛櫟陽令謝游皆貪猾
不遜持郡短長前二千石數案不能竟及宣視事詣府謁宣接待

甚備宣察湛有改節敬宣之效迺手自牒書條其姦臧封與湛湛自知罪臧皆應記即時解印綬付吏爲記謝宣無怨言而櫟陽令游自以大儒有名輕宣宣移書顯責之游得檄亦解印綬去又頻陽縣北當上郡西河爲數郡湊多盜賊其令平陵薛恭本縣孝者功次稍遷未嘗治民職不辦而粟邑縣小辟在山中民謹樸易治令鉅鹿尹賞久郡用事吏爲樓煩長舉茂才遷在粟宣即以令奏賞與恭換縣二人視事數月兩縣皆治宣得郡中吏民罪名輒召告其縣長吏使自行罰曉曰府所以不自發舉者不欲代縣治奪賢令長名也長吏莫不喜懼免冠謝宣歸恩受戒者宣爲吏賞罰明用法平而必行所居皆有條教可紀多仁恕愛利池陽令舉廉吏獄掾王立府未及召其妻受繫者錢再宿獄掾實不知慙恐自殺宣聞移書池陽以府決曹掾書立之柩以顯其魂宣性密靜有

思思省吏職求其便安下至財用筆研皆為設方畧利用而省費

吏民稱之郡中清靜

漢書本傳

翟方進字子威汝南上蔡人河平中為博士數年遷朔方刺史居官不煩苛所察應條輒舉甚有威名遷丞相司直帝欲試以治民徙為京兆尹搥擊豪強京師畏之時胡常為青州刺史聞之與書曰竊聞政令甚明為京兆能則恐有所不宜方進心知所謂其後少

弛威嚴居官三歲遷御史大夫

漢書本傳

何武字君公蜀郡郫縣人以射策甲科為郎光祿勳舉四行遷為郎令坐法免歸久之為司隸校尉徙京兆尹武為人仁厚好進士獎稱人之善然疾朋黨欲除吏先為科例以防請托其所居無赫赫名去後嘗見思

漢書本傳

王駿

吉子瑯琊
臯虞人

以孝廉為郎遷司隸校尉奏免丞相匡衡成帝欲大

用之出駿爲京兆尹試以政事先是京兆有趙廣漢張敞王尊王

章至駿皆有能名京師曰前有趙張後有三王漢書王吉傳

涓勲爲司隸校尉時北地浩商爲義渠長所捕亡長取其母與假猪

一連繫都亭下商兄弟會賓客自稱司隸掾長安縣尉殺義渠長妻

子六人亡丞相御史請遣掾史與司隸校尉部刺史并力逐捕察

無狀者奏可勲奏言春秋之義王人微者序乎諸侯之上尊王命

也臣幸得奉使以督察公卿以下爲職今丞相宣請遣掾史以宰

士督察天子奉使命大夫甚諄逆順之理願下中朝特進列侯將

軍以下正國法度議者以爲丞相掾不宜移書督趣司隸會浩商

捕得伏誅家屬徙合浦冊府元龜

孫寶字子嚴潁川鄆陵人爲京兆尹故吏侯文以剛直不苟合常稱

疾不肯仕寶以恩禮請爲布衣交進見如賓禮數月以立秋日暮

文東部督郵入見勅曰今日鷹隼始擊當順天氣取姦惡掾部渠
有其人子文曰霸陵杜季穉寶曰其次文曰豺狼當道不宜復問
狐狸寶默然穉季耳目長聞知之杜門穿舍後墻爲小戶但持鉏
自治園因文所厚自陳如此文曰誠能自改嚴將不治前事即不
更心但更門戶適趣禍耳穉季遂不敢犯法寶爲京兆尹三歲京
師稱之哀帝即位遷司隸初傳太后與中山孝王母馮太后俱事
元帝有郤傳太后使有司考馮太后令自殺衆庶寃之寶奏請覆
治傳太后大怒曰帝置司隸主使察我馮氏反事明白故欲摘缺
以揚我惡我當坐之上廼順指下寶獄大司馬傳喜光祿大夫龔
勝固爭上爲言太后出寶復官頃之鄭崇下獄寶上書言寃詔免

爲庶人

漢書
本傳

鮑宣字子都渤海高城人好學明經哀帝時爲司隸丞相孔光行園

陵官屬以令行馳道中宣出逢之使吏鉤止丞相掾史没入其車馬摧辱宰相事下御史中丞侍御史至司隸官欲捕從事閉門不納宣坐距閉使者亡人臣禮大不敬不道下廷尉獄博士弟子濟南王咸舉幡太學下曰欲救鮑司隸者會此下諸生會者千餘人朝日遮丞相自言丞相車不得行又守闕上書上遂抵宣罪減死一等髡鉗

漢書本傳

邴漢邴邴人以清行徵用至京兆尹王莽秉政漢乞骸骨歸老於鄉

里

漢書龔勝傳

鄧禹字仲華南陽新野人赤眉入關光武籌赤眉欲并關中以禹沉深有度乃拜爲前將軍持節西入關建武元年渡汾陰河入夏陽更始中郎將左輔都尉公乘歛引衆十萬與左馮翊兵共拒禹於衙禹破走之是時三輔覆敗赤眉所過殘賊百姓聞禹師行皆

紀降者日以千數衆號百萬禹所止輒停車住節以勞來之父老
童穉莫不感悅於是名震關西諸將勸禹徑攻長安禹曰不然赤
眉新拔長安財富充實鋒銳未可當也吾且休兵北道就糧養士
以觀其弊於是引軍北至枸邑擊破赤眉別將諸營保郡邑皆開
門歸附三年春赤眉西走扶風禹乃南至長安大饗士卒收十一
帝神主遣使奉詣洛陽因循行園陵置吏奉守引兵與延岑戰於
藍田不克就穀雲陽赤眉復還入長安禹敗走高陵乃徵還

後漢書本

傳

馮異字公孫潁川父城人建武二年赤眉延岑暴亂三輔郡縣大姓
各擁兵衆大司徒鄧禹不能定乃遣異代禹討之異引而西所至
皆布威信與赤眉遇於華陰戰數十合降其將劉始王宣等五千
餘人三年春拜異爲征西大將軍時延岑據藍田王歆據下邳芳

丹據新豐蔣震據霸陵張邯據長安公孫守據長陵楊周據谷口
呂鮪據陳倉角閼據汧路蓋延據盤屋任良據鄠汝章據槐里各
稱將軍擁兵多者萬人少者數千人轉相攻擊異且戰且行屯兵
上林苑中延岑既破赤眉欲據關中引張邯任良攻異異擊破之
斬首千餘級諸營保守附岑者皆來降岑遂自武關走南陽時百
姓飢餓道路斷絕委輸不至軍士悉以果實爲糧詔拜南陽趙匡
爲右扶風將兵助異并送縑穀異兵食漸盛乃稍誅擊豪傑不從
令者褒賞降附有功勞者悉遣其渠帥詣京師威行關中明年公
孫述遣將程焉出屯陳倉異與趙匡迎擊大破之焉退走漢川異
追戰於箕谷復破之還擊破呂鮪營保降者甚衆懷來百姓申理
枉結出入三歲上林成都六年春朝京師留十餘日令異妻子隨
異還西諸將上隴爲隗囂所敗乃詔異軍栒邑未及至隗囂來

使將行巡下隴取枸邑異潛往閉城偃旗鼓行巡不知馳赴之異卒擊鼓建旗而出巡軍驚亂奔走追擊大破之北地諸豪長耿定等悉降異又擊盧芳將賈覽破之上郡安定皆降

後漢書本傳

蓋延字巨卿漁陽人建武十一年拜為左馮翊

後漢書本傳

視事四年人

敬其威信

續漢書

祭遵潁川潁陽人建武二年春拜征虜將軍六年春詔遵與耿弇等從天水伐公孫述師次長安時車駕亦至隗囂不欲漢兵上隴使王元拒隴坻遵進擊破之及諸將到與囂戰並敗引退下隴乃詔遵軍汧八年秋復從車駕上隴囂破帝東歸過汧幸遵營勞饗士卒作黃門武樂良夜乃罷時遵有疾詔賜重茵覆以御蓋復令進屯隴下及公孫述遣兵救囂吳漢耿弇等悉奔還遵獨留不卻九年春卒於軍謚曰成侯

後漢書本傳

鮑永字君長上黨屯留人建武十一年爲司隸校尉辟扶風鮑恢爲都官從事恢亦抗直不避強禦帝常曰貴戚且宜斂手以避二鮑其見憚如此永行縣到霸陵路經更始墓引車入陌從事諫止之永曰親北面事人寧有過墓不拜雖獲罪所不避也遂下拜哭盡哀而去西至扶風椎牛上苟諫冢帝聞之問公卿曰奉使如此何如張湛對曰仁不遺舊忠不忘君行之高者也帝意乃釋子昱字文泉中元元年拜司隸校尉在職奉法守正有父風永平五年免

後漢書
本傳

鄭衆字仲卿河南開封人永平中遷左馮翊政有名迹

後漢書
鄭興傳

鄧壽字伯考汝南西平人以廉能稱舉孝廉肅宗擢爲京兆尹郡多強豪姦暴不禁三輔素聞壽皆懷震悚各自檢勅莫敢干犯壽雖威嚴而推誠下吏皆願效死莫有欺者

後漢書
鄧傳附

桓宣譙國人安帝時為梁州刺史時四方多事宜務本節用每農月

親載耒耜登臺勸民四民無惰業者歲屢豐稔

漢中府志

王堂字敬伯廣漢郫人遷右扶風安帝西巡阿母王聖中常侍江京

等並請屬於堂堂曰吾蒙國恩豈可為權寵阿意即日遣家屬歸

閉閣上病果有誣奏堂者會京等誅堂以守正見稱

後漢書本傳

陳禪字紀山巴郡安漢人舉茂才時漢中蠻夷反畔以禪為漢中太

守賊素聞其名即時降服遷左馮翊順帝即位遷司隸校尉卒於

官子澄有清名官至漢中太守

後漢書本傳

史敞為京兆尹有能名尤善條教見稱三輔

續漢書

和熹字景伯洛陽人為梁州刺史甚得百姓歡心被徵當遷吏人詣

闕請留之梁太后歎曰未聞刺史得人心若是乃許復留一年遷

漢陽太守戎夷男女送至漢陽界熹與相揖謝千里不得乘車

後漢

書本傳

梁並永嘉元年爲左馮翊時諸羌叛並以恩信招誘之於是離蒲狐

奴等五萬餘戶詣並降隴右復平

後漢書西羌傳

陳龜字叔珍上黨涇氏人永建中舉孝廉遷五原太守拜京兆尹時

三輔强豪之族多侵枉小民龜到厲威嚴悉平理其怨屈者郡内

大悅

後漢書本傳

延篤字叔堅南陽隼人舉孝廉遷左馮翊又徙京兆尹其政用寬仁

憂恤民黎擢用長者與參政事郡中歡愛三輔咨嗟焉先是陳留

邊鳳爲京兆尹亦有能名郡人爲之語曰前有趙張三王後有邊

延二君

後漢書本傳

劉陶字子奇潁川潁陰人靈帝時遷尚書令以數切諫爲權臣所憚

徙爲京兆尹到職當出修宮錢直千萬陶既清貧恥以錢買職

疾不聽政帝宿重陶才徵拜諫議大夫

後漢書本傳

樊陵

字德雲為京兆尹

陽陵縣東涇水長流溉灌維首牧人之吏謀不假給

光和五年京兆尹樊陵勤恤人隱悉心政事命方畧大吏趙遂令

伍瓊權度計慮揆程經用以事上聞遂樹柱累石委薪積土折湍

流疏水門會於新渠灑於畎畝昔日鹵田化為甘壤粳黍稼穡所

入不可勝筭農民熙怡悅豫謳談疆畔謂之樊惠渠

蔡邕樊惠渠頌序

蓋勲字元固敦煌人司隸張溫舉為京兆尹時長安令楊黨父為中

常侍恃勢貪放勲案得其贓千餘萬貴戚咸為之請勲不聽具以

事聞并連黨父有詔窮案威震京師時小黃門京兆高望為尚藥

監幸於皇太子太子因蹇碩屬望子進為孝廉勲不肯用或曰皇

太子副主望其所愛碩帝之寵臣而子違之所謂三怨成府者也

勲曰選賢所以報國也非賢不舉死亦何悔及董卓廢少帝徵為

議即時左將軍皇甫嵩精兵三萬屯扶風勲密相要將以討卓會

嵩亦破徵勲以衆弱不能獨立遂並還京師後漢書本傳時漢陽叛人

王國衆十餘萬攻陳倉三輔震動勲領郡兵五千人請滿萬人因

表用處士扶風孫瑞為鷹鷂都尉桂陽魏傑為破敵都尉京兆杜

楷為威虜都尉弘農楊儒為烏擊都尉長陵第五雋為清寇都尉

悉領屬勲績漢書

段熲武威人魏志董卓遷天子西都長安使中郎將段熲屯華陰及李

傪郭汜等亂天子東歸車駕至華陰寧輯將軍段熲具服御及公

卿以下資儲請帝幸其營初楊定與熲有隙遂誣熲欲反乃攻其

營十餘日不下熲猶奉給御膳廩贍百官終無二意後漢書董卓傳熲在

華陰特修農事典略

鍾繇字元常潁川長社人建安初關中諸將馬騰韓遂等各擁兵

相爭太祖方有事山東乃表繇以侍中守司隸校尉持節督關中諸軍委之以後事特使不拘科制繇至長安移書騰遂等爲陳禍

福遂各遣子入侍

三國志本傳

衛覲字伯儒安邑人除茂陵令太祖征袁紹而劉表爲紹援關中諸將又中立覲以侍御史使益州令劉璋下兵以綴表軍至長安道路不通覲不得進遂留鎮關中時四方還民關中諸將多引爲部曲覲書與荀彧曰關中膏腴之地頃遭荒亂人民流入荊州者十萬餘家聞本土安寧皆企望思歸而歸者無以自業夫鹽國之大寶也自亂來放散宜如舊置使者監賣以其直益市犂牛若有歸民以供給之勤耕積粟豐殖關中遠民聞之必日夜競還又使司隸校尉留治關中以爲之主則諸將日削官民日盛此彊本弱敵之利也或以白太祖從之

三國志本傳

魏書曰時關西諸將外雖懷附

內未可信司隸校尉鍾繇求以三千兵入關外托討張魯內以脅取質任太祖使荀彧問覲覲以為西方諸將皆豎夫崛起無雄天下意厚加爵號得其所志非有大故不憂為變宜為後圖若以兵入關中當討張魯地險眾強殆難為慮彧以覲議呈太祖太祖初善之而以繇自典其任遂從繇議兵始進關右大叛太祖親征乃平之太祖悔不從覲議由是益重覲

本傳注○按衛覲臣於曹氏應入三國但此係建安中事

故與鍾繇傳並列漢末

魏延字文長義陽人先主遷治成都當得重將以鎮漢中眾論以為必在張飛飛亦以心自許先主乃拔延為督漢中鎮遠將軍領漢中太守一軍盡驚先主大會群臣問曰今委卿以重任卿居之云何延對曰若曹操舉天下而來請為大王拒之偏將十萬之眾至請為大王吞之先主稱善眾咸壯其言建興五年諸葛亮

更以延督前部八年使延西入羌中與費瑀郭淮戰大破之遷征

西大將軍封南鄭侯

三國志本傳

王平字子均巴西宕渠人建興十二年副車騎將軍吳壹住漢中領漢中太守十五年代壹督漢中延熙六年拜鎮北大將軍統漢中七年春魏大將軍曹爽率步騎十餘萬向漢川前鋒已在駱谷時漢中守兵不滿三萬諸將大驚或曰今力不足以拒敵當固守漢樂二城北爾間涪軍足得救關平曰不然漢中去涪千里賊若得關便爲禍也今宜先遣劉護軍社參軍據興勢平爲後拒若賊分向黃金平率千人下自臨之比爾間涪軍行至此計之上也惟護軍劉敏與平意同即便施行魏軍退還如平本策

三國志本傳

劉敏左

護軍揚威將軍與鎮北大將軍王平俱鎮漢中魏遣曹爽襲蜀時議者或謂但可守城不出拒敵必自引退敏以爲男女布野農穀

栖畝若聽敵入則大事去矣遂帥所領與平據興勢多張旗幟彌

亘百餘里會大將軍費禕從成都至魏軍即退

三國志
蔣琬傳

傳歛義陽人爲關中都督景耀六年臨危授命論者嘉其忠義

三國志
楊

戲傳

夏侯淵字妙才沛國譙人建安二十一年太祖西征張魯漢中平留

淵守漢中即拜淵征西將軍二十三年劉備軍陽平關淵率諸將

拒之相守連年爲備所襲遂戰死

三國志
本傳

世語曰淵第五子榮字

幼權漢中之敗榮年十三左右提之走不肯曰君親在難焉所逃

死乃奮劍而戰遂沒陣

本傳注○按夏侯淵守漢中雖建安
年間事然與鍾繇衛覲不同故入魏

杜襲字子緒潁川定陵人領丞相長史隨太祖到漢中討張魯太祖

還留督漢中軍事經懷開導百姓自樂出徙洛鄴者八萬餘口

侯淵沒襲與張郃郭淮糾攝諸軍事權宜以郃為督以一衆心三
軍遂定太祖東還當選留府長史鎮守長安主者所選皆不當太
祖令曰釋騏驥而不乘焉皇皇而更索遂以襲為留府長史駐關
中文帝踐阼入為尚書

三國志本傳

趙儼字伯然陽翟人遷扶風太守太祖徙出故韓遂馬超兵五千餘
人使將軍殷署等督領以儼為關中護軍盡統諸軍羌虜數來寇
害儼追到新平大破之屯田客呂並據陳倉儼復攻之賊即破滅
時被書差千二百兵往助漢中守署督送之儼慮其有變自至斜
谷口人人慰勞又深戒署署軍前果叛儼自隨步騎百五十人皆
與叛者同部曲或婚姻得此問各不自安儼盡呼所從人喻以成
敗慰勵懇切皆不敢有二前到諸營各召料簡諸奸結叛者八百
餘人惟取其魁率治之餘一不問乃即相率還降太祖遣將軍劉

柱將二千人當須到乃發遣而事露諸營大駭儼宣言當差留新兵之溫厚者千人守關中其餘悉遣東便見主者內諸營兵名籍案累重立差別之留者意定其當去者亦不敢動儼一日盡遣上道因使所留千人分布羅落之東兵尋至乃復脅喻并徙千人令相及共東凡所全致二萬餘口齊王即位以儼監雍涼諸軍事又遷征西將軍都督雍涼正始四年徵為驃騎將軍

三國志本傳

魏略曰

舊故四征有官厨財籍遷轉之際無不因緣而儼义手上車發到灞上忘持其常所服藥雍州聞之乃追送雜藥材數箱儼笑曰人言語殊不易我偶問所服藥耳何用是為耶遂不取

本傳

郭淮字伯濟太原陽曲人從征漢中太祖還留征西將軍夏侯淵拒劉備以淮為淵司馬淵遇害淮收散卒推盪寇將軍張郃為軍主諸營乃定其明日備欲渡漢水來攻諸將議眾寡不敵欲依水為

陣以拒之淮曰此示弱而不足挫敵不如遠水爲陣引而致之半濟而後擊備可破也既陣備疑不渡淮遂堅守以狀聞太祖善之假郃節復以淮爲司馬文帝賜爵關內侯轉鎮西長史又行征羗護軍護左將軍張郃冠軍將軍楊秋討山賊鄭甘盧水叛胡皆破平之關中始定民得安業黃初元年擢領雍州刺史五年爲真太和二年蜀相諸葛亮出祁山遣將軍高詳屯列柳城淮攻詳破之加建威將軍五年隴右無穀議欲關中大運淮以威恩撫循羗胡家使出穀平其輸調軍食用足轉揚武將軍青龍二年諸葛亮出斜谷時司馬宣王屯渭南淮策亮必爭北原宜先據之遂屯北原蜀兵大至淮逆擊後數日亮盛兵西行淮以爲此必攻陽遂耳其夜果攻陽遂有備不得上正始元年蜀將姜維出隴西淮進軍維退遂討羗迷當等按撫柔氏三千餘落拔徙以實關中遷左將軍

梁州休屠胡梁元碧等率種落二千餘家附雍州淮奏請使居安定之高平爲民保障其後因置西川都尉轉拜前將軍領州如故

正元二年薨諡曰貞侯

三國志本傳

陳泰字元伯潁川許昌人嘉平初代郭淮爲雍州刺史蜀將姜維率衆依麴山築二城使句安李歆等守之聚羌胡質任等寇逼都郡征西將軍郭淮與泰謀曰麴城雖固去蜀險遠當須運糧羌夷患維勞役必未肯附今圍而取之可不血刃而拔其城淮從泰計使泰率討蜀護軍徐質汝南太守鄧艾等進兵圍之安等挑戰不許將士困窘維來救出自牛頭山與泰相對泰曰兵法貴不戰而屈人今絕牛頭維無反道則我之禽也勅諸軍各堅壘勿與戰遣使白淮使淮趣牛頭截其去路可並取維不惟安等而已淮善其策率諸軍軍洮水維遁走安等遂降淮薨泰代爲征西將軍假節

督雍涼諸軍事景元元年薨謚穆侯

三國志本傳

司馬望字子初為征西將軍持節都督雍涼二州諸軍事在任八年

威化明肅先是蜀將姜維屢寇關中及望至廣設方畧維不得為

寇關中賴之

晉書安平獻王孚傳

晉

司馬駿

宣帝子

字子臧武帝踐阼遷鎮西大將軍使持節都督雍涼等

州諸軍事鎮關中駿善撫御勸督農桑與士卒分役已及僚佐并

將帥兵士等人限田十畝具以表聞詔遣普下州縣使各務農事

咸寧初樹機能等叛遣眾討之斬三千餘級進位征西大將軍開

府辟召儀同三司徙封扶風王及薨西土泣者盈路百姓為之樹

碑長老見碑無不下拜其遺愛如此

晉書本傳

邵詵字廣基濟陰單父人累遷雍州刺史在任威嚴明斷甚得聲譽

卒於官

晉書本傳

范晷字彥長南陽順陽人爲司徒左長史轉馮翊太守甚有政能善於撫綏百姓悅之轉雍州刺史時西土荒毀氏羌蹈藉桑田失收晷傾心化導勸以農桑所部甚賴之元康中卒於官

晉書本傳

劉沉字道真荊人領雍州刺史張方既逼京師王師屢敗詔沉使發兵襲顓

河間王

沉奉詔馳檄四境合七郡之衆及防守諸軍塢壁甲

士萬餘人以安定太守衛博安定功曹皇甫澹爲先登襲長安顓時頓於鄭縣之高平亭爲東軍聲援聞沉兵起還鎮渭城遣督護虞襲逆沉戰敗顓大懼退入長安沉渡渭而壘顓遣兵出鬪輒不利沉乘勝攻之使澹博以精甲五千從長安門入力戰至顓帳下沉軍來遲澹等無繼馮翊太守張輔率衆救顓橫擊之大戰於府門博父子皆死之澹被擒不屈見殺沉軍遂敗與麾下百餘人

遁爲陳倉令所執沉謂顥曰知己之顧輕在三之節重投袂之日
期之必死菹醢之戮甘之如飴辭氣慷慨顥怒鞭之而後腰斬

晉書

本傳

賈疋字彥度武威人少有志畧器望甚偉歷遷雍州刺史時諸郡飢
饉百無一存疋帥戎晉二萬餘人將伐長安劉粲聞之使劉曜劉
雅及趙染距疋疋邀擊大敗之曜中流矢退走疋追之至於甘泉
旋自渭橋擊蕩仲殺之遂迎秦王奉爲皇太子後蕩仲子夫護帥
群胡攻之疋敗走夜墮於澗爲夫護所害疋勇畧有志節以匡復
晉室爲己任不幸顥墜時人咸痛惜之

晉書本傳

索綝字巨秀敦煌人舉秀才除好畤令轉長安令在官有稱遷新平
太守時劉聰將蘇鐵劉五斗等劫掠三輔除綝安西將軍馮翊太
守綝有威恩華戎嚮服賊不敢犯及懷帝蒙塵長安又陷綝與雍

州刺史賈正扶風太守梁綜等糾合義衆頻破賊黨修復舊館遷定宗廟進救新平小大百戰秦王即位是爲愍帝絺遷京兆尹

索靖傳

張光字景武江夏鍾武人北地都尉以百餘人戍馬蘭山北賊圍之百餘日光撫厲將士屢出奇兵擊賊破之會梁王彤遣司馬索靖將兵迎光舉軍悲泣遂還長安彤表光處絕圍之地有耿恭之忠宜加甄賞以明獎勸於是擢授新平太守遷材官將軍梁州刺史先是秦州人鄧定等二千餘家飢餓流入漢中保於城固漸爲抄盜梁州刺史張殷遣巴西太守張燕討之定窘急僞乞降於燕並餽燕金銀燕喜爲之緩師定密結李雄雄遣衆救定燕退定進逼漢中太守杜正冲東奔魏興殷亦棄官遁光不赴州止於魏興乃結諸郡守共謀進取綏撫荒殘百姓悅服於是却鎮漢中時逆賊

王如餘黨李運楊武等大盛光嬰城固守自夏迄冬憤激成疾佐吏及百姓咸勸光退據魏興光按劍曰吾受國厚恩不能翦除寇賊何得退還聲絕而卒百姓悲泣遠近傷惜之其後南陽太守應詹白都督王敦稱光在梁州興微繼絕威振巴漢值中原傾覆外無救助內闕資儲經年抗禦厲節不撓宜應追論顯贈以慰存亡

不從

晉書本傳

周訪字士達汝南安成人杜曾寇害元帝命訪擊之遂定漢沔以功遷南中郎將督梁州諸軍梁州刺史務農訓卒勤於採納守宰有缺輒補然後言上遠近悅服卒諡曰壯子撫強毅有父風永和初桓溫征蜀進督梁州之漢中四郡軍事在州三十餘年卒諡曰襄子楚監梁益二州假節世在梁益甚得物情時梁州刺史司馬勲作逆楚與朱序討平之又隴西人李高詐稱雄子破洛城梁州刺

史揚亮失守楚討平之卒謚曰定子瓊勁烈有將畧代楊亮為梁州刺史初氐人竇衝求降朝廷以為東羗校尉後衝反欲入漢川安定人皇甫釗京兆人周勲等謀納衝瓊密知之收釗勲等斬之

晉書本傳

陳頽字延思陳國苦人陶侃表為梁州刺史綏懷荒弊甚有威惠

本傳

劉道產彭城呂人元嘉三年累遷梁南秦二州刺史加都督在州有

惠化

南史劉康祖傳

蕭思話南蘭陵人元嘉九年仇池大飢益梁州豐稔氏帥楊難當

漢中起思話督梁南秦二州諸軍事梁南秦二州刺史既行

威將軍南漢中太守蕭承之前進十年二月遣行

濟率偏軍出洋川與承之合賊敗走漢中平悉收沒地置戍葭萌水遷鎮南城加節號寧羌將軍太祖使思話上平漢中本末下史

官累官鎮西將軍

宋書本傳

劉鎮道彭城人元嘉十四年出為梁秦二州刺史氏帥楊難當侵漢中鎮道討破之十九年與裴方明進軍大致克捷難當奔上郡仇

池遂平

舊志

劉秀之字道寶東莞莒人元嘉二十五年除督梁南北秦三州諸軍事梁南秦二州刺史時漢川飢儉境內騷然秀之善於為政躬自儉約先是漢川以絹為貨秀之限令用錢百姓受其利二十七年大舉北伐秀之節度諸軍震蕩汧隴氏賊楊高為寇秀之討之斬高兄弟遷益州刺史折留俸祿二百八十萬付梁州鎮庫此外蕭然秀之為治整肅以身率下遠近安悅焉

宋書本傳



長沙王懿梁武帝兄永明末為梁南秦二州刺史魏軍入漢中圍南
鄭懿隨機拒擊乃解圍遁去又遣氏帥楊元秀攻取魏歷城等六
戍魏人震懼邊境遂寧

南史
本傳



陰子春字幼文武威姑臧人梁武帝踐阼遷都督梁秦二州刺史子
春雖無他才行臨人以廉潔稱

南史
本傳

裴邃字淵明河東聞喜人天監時為北梁秦二州刺史開創屯田數
千頃倉廩盈實省息邊運民吏獲安乃相率餉絹千餘匹邃從容
曰汝等不應爾吾又不可逆納其絹二匹而已

梁書
本傳

蘭欽字休明中昌魏人幼而果決趨捷過人大通時密勅欽向魏興
經南鄭屬魏將托跋勝寇襄陽除持節督南梁南北秦沙四州

軍事光烈將軍平西校尉梁南秦二州刺史梁漢底定魏遣都督董紹張獻攻圍南鄭梁州刺史杜懷珪請救欽率所領援之大破紹獻於高橋城斬首二千餘紹獻奔退追入斜谷斬獲畧盡西魏相宇文泰致馬二千匹請結隣好詔加散騎常侍進號仁威將軍

梁書
本傳

蕭循南蘭陵人爲梁秦二州刺史移風易俗人號慈父時蝗害禾循深自咎責忽飛鳥千羣下食蝗盡

雍大
記

李暉成紀人爲梁洋州十州總管軍事梁州刺史時渠蓬二州生獠積年侵暴暉至州綏撫並來歸附朝廷重書勞之

舊
志

薛辯字允白河東汾陰人魏東雍州刺史明元深加器重曰朕委卿西蕃志在闕右卿宜克終良筭與朕爲長安主人辯務農教戰恒

以數千之衆摧抗赫連氏帝甚褒獎之

北史本傳

莫雲雁門繁峙人好學善射世祖克赫連昌詔雲與常山王素留鎮

統萬進爵安定公時初并河西人心未一雲撫慰新舊皆得其所

卒諡曰敬

魏書莫含傳

竇瑾字道瑜頓丘衛國人拜使持節都督秦雍二州諸軍事寧西將

軍長安鎮將在鎮八年甚著威惠

魏書本傳

陸俟代人世祖以俟都督秦雍二州諸軍事與高涼王那擊蓋吳於

杏城大破之遷內都大官安定盧永劉超等叛世祖以俟恩被

於關中詔都督秦雍諸軍事鎮長安遂平之

魏書本傳

樂安王範性沉厚寬仁世祖以長安形勝之地非範莫可任者乃拜

範都督五州諸軍事長安鎮都大將範謙恭惠下推心撫綏百姓

稱之時秦土新罹寇賊流亡相繼範請崇易簡之治帝

崔元伯弟徽字元猷河東武城人樂安王範鎮長安世祖以範年
少三秦民夷恃險多變乃選忠清舊德之士與範俱鎮以徽為散
騎常侍督雍涇梁秦四州諸軍事平西將軍副將行樂安王傳徽
為政務存大體不親小事性好人倫引接賓客或談及平生或講
論道義誨誘後進終日不止以疾徵還京師

魏書崔元伯傳

奚眷代人少有將畧世祖初鎮虎牢尋徙鎮長安世祖幸美稷眷受

詔督諸軍討山胡白龍於西河破之

魏書本傳

司馬楚之字德秀河內溫人宋將裴方明胡崇之寇仇池以楚之為
假節與皮豹子等督關中諸軍從散關西入擊走方明禽崇之仇

池平而還

魏書本傳

古弼代人拜安西將軍鎮長安甚著威名

魏書本傳

伊馱代人真君初為東雍州刺史恩化大行百姓思之

魏書本傳

臨淮王他拜使持節都督雍秦二州諸軍事雍州刺史鎮長安撫綏

秦土得民夷之心

魏書陽平王熙傳

皮豹子漁陽人眞君三年劉義隆遣將裴方明等陷仇池世祖徵豹子拜仇池鎮將督關中諸軍仇池平諸氏復推楊文德爲主興安二年正月宋將蕭道成王虬馬光等入漢中別令楊文德楊頭等率氏羗圍武都豹子將救之至女磊聞賊停車遣人於祁山取馬欲往赴援文德謂豹子欲斷其糧運回軍還入覆津據險自固義隆又增兵益將令晉壽白水送糧覆津漢川武興運粟甘泉皆置倉儲豹子表乞選兵增戍詔高平鎮將苟莫于率突騎二千以赴之道成等乃退

魏書本傳

張黎雁門平原人世祖加征北大將軍鎮長安清約公平甚著

代下之日家無餘財

魏書本傳

李惠中山人爲雍州刺史加長安鎮大將長於思察雍州廳事有燕
爭巢鬪已累日惠令人壩獲使卒以弱竹彈兩燕既而一去一留
惠笑謂吏屬曰此留者白計爲巢功重彼去者既經楚痛理無回
心群下服其聰察人有召鹽負薪者同釋重擔息於樹陰二人將
行爭一羊皮惠令人置羊皮席上以杖擊之見少鹽屑曰得其實
矣使爭者視之負薪者乃伏而就罪凡所究察多如此類由是吏
民莫敢欺犯

魏書
本傳

陸真代人高宗即位遷安西將軍長安鎮將是時初置長蛇鎮真率
衆築城未訖氏豪仇儔檀等反叛氏民咸應真擊平之卒城長蛇
而還東平王道符反於長安殺雍州刺史魚元明關中草草以真
爲長安鎮將長安兵民素服威信真到撫慰之皆怡然安靜咸陽
民趙昌受劉彧署龍驤將軍扇動鄜藍屋二縣據赤谷以叛真與

雍州刺史劉邈討平之後鄠縣民王稚兄弟招引趙昌始平石安
池陽靈武四縣人皆應之據治谷堡真與雍州刺史劉邈擊破之
斬昌及賊首三千餘級傳首京師并誅其黨與七百餘人雍州民
夷莫不震伏在鎮數年甚著威稱延興二年卒歸葬京師諡曰烈
魏書本傳

京兆王子推太安五年位侍中征南大將軍長安鎮都大將性沉雅
善於綏接秦雍之人服其威惠

魏書本傳。按子推係元魏宗室
京兆乃其王封非京兆人王姓也
賈志作王子
惟京兆人悞

源思禮後賜名懷高宗末出為長安鎮將雍州刺史清儉有惠政
於撫恤劫盜息止流民皆相率來還

魏書源
賀傳

張白澤上谷沮陽人行雍州刺史清心少欲吏民安之

魏書張
玄傳

衍字安樂位梁州刺史轉雍州刺史性清慎所在廉潔不營產業

稱績

魏書陽平王新成傳

任城王雲

景穆帝子

高祖遷使持節都督陝西諸軍事長安鎮都大將雍

州刺史雲廉謹自修留心庶獄挫抑豪強群盜息止州民頌之者

千有餘人文明太后嘉之賜帛千匹太和五年薨於州

魏書本傳

苟類代人拜洛州刺史為政剛嚴抑強扶弱山蠻畏威不敢為寇

魏書

本傳

李崇字繼長頓丘人高祖初行梁州刺史巴氏擾動詔崇為荊州刺

史鎮上洛勅發陝秦二州兵送崇至治辭曰邊人失和本怨刺史

奉詔代之自然易帖但須一宣詔旨而已不勞發兵自防使懷懼

也高祖從之乃輕將數十騎馳到上洛宣詔綏慰當即帖然尋勅

邊戎掠得蕭贖人者悉令還之南人感德兩境交和無烽燧之警

在治四年甚有稱績後車駕南討漢陽崇行梁州刺史氏楊靈珍

遣弟婆羅與子雙領步騎萬餘襲破武興與蕭鸞相結詔崇率衆數萬討之崇多設疑兵襲剋武興靈珍走奔漢中以崇爲都督梁秦二州諸軍事梁州刺史及靈珍偷據白水崇擊破之靈珍遠遁

魏書本傳

尉元字苟仁代人太和初出爲使持節鎮西大將軍開府統萬鎮都

將其得夷民之心

魏書本傳

劉藻字彥先廣平易陽人永安中北地諸羌數萬家恃險作亂前後牧守不能制姦暴之徒並無名實朝廷患之以藻爲北地太守藻推誠布信諸羌咸來歸附藻書其名籍收其賦稅朝廷嘉之遷龍驤將軍雍城鎮將先是氐豪徐成楊黑等驅逐鎮將故以藻代之至鎮擒獲成黑等斬之以徇群氐震懼在任八年遷離城鎮將太和中改鎮爲岐州以藻爲岐州刺史車駕南伐與安南將軍元英

征漢中頻破賊軍長驅至南鄭垂平梁州奉詔還軍乃不果克

魏書

本傳

賈儁字異隣武威姑臧人爲荊州刺史先是上洛置荊州後改爲洛

州在重山中民不知學儁乃表置學官選聰悟者以教之在州五

載清靜寡事吏民亦安

魏書賈彞傳

熒

安定王休子

世宗初除華州刺史熒表曰謹惟州治李潤堡雖是少梁

舊地晉芮錫壤然胡夷內附遂爲戎落城非舊邑先代之名爰自

國初護荒小戍及改鎮立郡依岳立州因藉倉府未刊名實竊見

馮翊古城羗魏兩民之交許洛水陸之際先漢之左輔皇魏之右

翼形勝名都實惟西蕃輿府今州之所在豈惟非舊至乃居岡飲

澗井谷穢雜升降劬勞往還數里譟諸明昏有虧禮教未若馮翊

面華渭包原澤井淺池平樵牧饒廣採材華陰陸運七十伐木龍

門順流而下陪削舊雉功省力易人各爲已不以爲勞昔宋民無井穿井而忻得人況合城無水得水而不家慶竊聞前政刺史非是無意或值兵舉或遇年災緣此契濶稽延至此去歲已熟秋方大登四境宴安京師無事丁不十錢之費人無八旬之勤損輕益重乞垂昭鑒遂詔曰一勞永逸便可聽移後除幽州刺史

魏書安定王休

傳

崔亮字敬儒清河東武城人世宗除安西將軍雍州刺史城北渭水淺不通船行人艱阻亮謂寮佐曰昔杜預造河梁況此有異長河且魏晉之日亦自有橋吾今決欲營之咸曰水淺不可爲浮橋汎長無恒又不可施柱恐難成立亮曰昔秦居咸陽橫橋渡渭以像閭道此即以柱爲橋今惟慮長柱不可得耳會天大雨山水暴至浮出長木數百根藉此爲用橋遂成立百姓利之至今猶名崔公

橋亮性公清敏於決斷所在並號稱職三輔服其德政世宗嘉之

詔賜衣馬被褥

魏書本傳

邢巒字洪賓河間鄭人宣武時正尚書梁秦二州行事夏侯道遷以漢中內附詔加巒使持節征梁漢諸軍事進退徵攝得以便宜從事巒至漢中遣兵討之賊皆歿附乘勝追奔至關城之下詔拜巒使持節梁秦二州刺史於是開地定境東西七百南北千里獲郡四十二部護軍及諸縣戍巒至漢中從容風雅接豪右以禮撫細

民以惠

北史本傳

李叔虎渤海蓆人除假節行華州事為吏民所稱

魏書本傳

奚康生河南洛陽人出為平西將軍華州刺史頗有聲績

魏書本傳

崔延伯博陵人永平中為岐州刺史假征西將軍正光五年莫折天生下隴東寇詔延伯為使持節征西將軍西道都督討之天生悉

衆來戰延伯身先士卒陷其前鋒大破之俘斬十餘萬授右衛將軍延伯善將撫得衆心爲諸將之冠末路功名尤重

魏書本傳

源子雍字靈和西平樂都人肅宗踐阼遷夏州刺史時沃野鎮人破洛汗拔陵首爲反亂所在蜂起統萬逆胡與相應接子雍嬰城自守城中糧盡子雍善綏撫得士心人人戮力無有離貳以飢饉轉切留子延伯據守自率羸弱向東夏運糧行數日爲朔方胡帥曹阿各拔所邀力屈見執子雍爲陳安危禍福之理勸阿各拔令降阿各拔未果而死拔弟桑生竟隨子雍降時北海王顥爲大行臺子雍具陳賊可滅之狀顥給子雍兵馬令其先行時東夏合境反叛所在屯結子雍轉鬪而前仍平東夏徵稅租粟運於統萬於是二夏漸寧及蕭寶夤爲賊所敗賊帥宿勤明達遣息阿非率衆邀路華州白水被圍逼關右懸擾咫尺不通遂率士馬并夏州募義

之民携家席卷鼓行南出生禽康維摩又攻賊帥契官斤於楊氏
堡破之復破阿非軍多所斬獲詔遣城陽王徽於潼關宣旨慰勞
封樂平縣公子雍長子延伯城鬪野戰勇冠三軍子雍向東夏留
延伯城守延伯與兵士共分湯菜防固城隍及子雍爲胡所執合
城憂懼延伯曰吾父吉凶不測方寸焦爛但奉命守城所爲處重
若以私害公誠孝並闕諸君幸得此心無虧所寄於是衆感其義
莫不勵憤朝廷聞而嘉之除龍驤將軍行夏州事卒能固守及後
刺史至延伯率領義衆還赴子雍先鋒陷陳身禽維摩及至白水
首摧阿非隨子雍至都進爵浮陽伯

魏書源
賀傳

畢祖暉東平須昌人神龜初除右將軍幽州刺史入爲平東將軍正
光五年幽州民反招引隴賊攻逼州城以祖暉前在州日得民情
和復授平西將軍幽州刺史假安西將軍爲別將以討之祖暉且

戰且前突圍入治孝昌初北海王顥救至城圍始解以全城之勲

封新昌縣開國子尋假征鹵將軍行鹵州事賊宿勤明達復攻祖

暉祖暉兵少糧竭軍援不至為賊所乘遂歿

魏書畢衆敬傳

張普惠字洪賑常山九門人為尚書右丞先是仇池武興郡氏數反

西垂郡戍租運久絕詔普惠以本官為持節西道行臺給秦岐涇

華雍鹵東秦七州兵武三萬人任其召發送南秦東益二州兵租

分付諸戍其所部將統聽於關西牧守之中隨機召遣軍資板印

之屬悉以自隨事訖還朝賜絹布一百段

北史本傳

劉道斌武邑灌津人世宗時遷岐州刺史有清治之稱正光四年卒

於州

魏書本傳

裴芬之字文馥河東聞喜人轉東秦州刺史在州有清靜之稱徙岐

州刺史正光末元志西討隴賊軍敗退守岐州為賊所圍城陷芬

之為賊擒送上邽為莫折念生所害贈平東將軍青州刺史

魏書裴叔業

傳

魏蘭根鉅鹿下曲陽人孝昌初轉岐州刺史從行臺蕭寶夤討破宛州俘其民人為奴婢以美女十人嘗蘭根蘭根盡以歸其父兄部內麥多五穗隣州田鼠為災犬牙不入岐境屬秦隴反叛寶夤敗於涇州高平虜賊逼岐州州城民逼囚蘭根降賊寶夤至雍州收輯散亡兵威復振城民復斬賊刺史推蘭根復任朝廷以蘭根得西土人心加持節假平西將軍都督涇岐東秦南岐四州軍事兼

四州行臺尚書

北齊書本傳

酈道元字善長范陽涿鹿人除御史中尉時雍州刺史蕭寶夤反狀稍露侍中城陽王徽素忌道元因諷朝廷遣為關右大使寶夤慮道元圖已遣其行臺郎中郭子帙圍道元於陰盤驛亭亭在岡上

既被圍穿井十餘丈不得水水盡力屈道元與其第二子俱被害

道元瞋目叱賊厲聲而死事平贈吏部尚書冀州刺史

北史本傳

張熠字景世南陽西鄂人永安初除平西將軍岐州刺史矜恤貧弱

為民所愛

魏書本傳

董紹字興遠新蔡鮦陽人永安中除梁州刺史假撫軍將軍兼尚書

為山南行臺頗有清稱

魏書本傳

魏子建字敬忠初世祖時平氏遂於武興立鎮尋改為東益州其後

鎮將刺史乖失人和群氏作梗遂為邊患乃除子建東益州刺史

子建布以恩信風化大行遠近清靜正光中子建屢求歸京師遣

刺史唐永代焉子建將還群氏慕戀相率斷道主簿楊僧覆先行

曉諭諸氏念曰我留刺史爾送出也子建徐加諭譬旬日方得前

行吏人贈遺一無所受自開華陽等郡梁州邢巒益州傅豎眼及

子建為最

魏書魏收自序

唐永北海平壽人耿介有將帥才正光中為北地太守當郡別將俄而賊將宿勤明達等寇郡境永擊破之境內稍安永善馭下士人競為之用臨陣當著帛裙襦把角如意以指麾處分辭色自若在北地四年與賊數十戰未嘗敗北時人語曰莫陸梁恐爾逢唐將永所營處至今猶稱唐公壘也大統元年拜東雍州刺史尋加衛將軍卒贈司空

北史本傳

杜顥字思顏京兆人有幹用孝昌二年為西征軍司行岐州事蕭寶夤起逆顥據州不從以勲封平陽縣開國伯永安中万俟醜奴克斥關右不行乃為都督防守岐州醜奴攻之不克後為征西將軍

沒於關西

魏書杜銓傳

長孫儉代人本名慶明孝昌中邊方騷勲儉初假東夏州防城大都

督從爾朱天光破宿勤明達等周文臨夏州深敬器之轉夏州刺史甚得人和時西夏州仍未內屬東魏遣許和為刺史儉以信義招之和乃歸附即以儉為西夏州刺史總統三夏州諸軍事周文表授東南道行臺僕射所部鄭縣令泉璨為百姓所訟推按獲實即大集僚屬于廳事前引已過肉袒自罰於是屬城肅勵莫敢犯法後卒于夏州總管

北史長孫嵩傳

雷紹字道宗武川鎮人賀拔岳以紹為京兆太守清平理物甚得人

和

北史本傳○按此在孝武西都之後故京兆太守入節鎮

郭琰字神寶京槃人魏孝武時除洛州刺史孝武西入授行臺尚書潼關大都督齊神武遣大都督竇泰襲弘農時琰衆少戰敗乃奔洛州與刺史泉企城守力窮城陷竟為東魏將高敖曹所擒謂敖曹曰天子之臣乃為賊所執敖曹素聞其名義不殺送并州見神

武言色不屈見害

北史本傳

乙速孤佛保北秀容胡酋也孝武帝時從入關大統初梁將蘭欽來

寇遂陷漢中佛保時為都督統兵力戰知將敗乃先城未陷仰天

大哭曰此馬吾常所乘此弓矢天恩賜我豈可令賊得吾弓馬乎

遂斬馬及弓自刎而死三軍莫不壯之黃門郎趙僧慶時使漢中

聞乃收其屍致長安天子歎感詔著作錄之

北史本傳

薛長瑜河東汾陰人天平中為洛州刺史擊賊潼關沒於陳

魏書薛辯傳

王德字天恩代武川人孝武西遷行東雍州事在州未幾百姓懷之

大統元年遷北雍州刺史

北史本傳

楊儉字景則

華陰人

孝武初除北雍州刺史政尚寬惠夷夏安之大統

七年為都督東雍華二州諸軍事華州刺史卒于家

周書楊寬傳

韓褒字弘業潁川潁陽人大統初為北雍州刺史州帶北山多有盜

賊褒密訪之並豪右所爲乃悉召傑黠少年素爲鄉里患者置爲主帥分其地界盜發不獲以故縱論於是諸被署者莫不惶惧皆首伏曰前盜並某等爲之所有徒侶皆列其姓名或亡命隱匿者亦悉言所在褒乃取盜名簿藏之因大榜州門曰自知行盜者可急來首即除其罪盡今月不首者顯戮其身籍沒妻子以賞前首者旬日之間諸盜咸悉首盡褒取名簿勘之一無差異並原其罪許以自新由是群盜屏息

北史本傳

宇文導字菩薩少雄豪有仁惠文帝東征留導爲華州刺史及趙青雀于伏德慕容思慶等作亂導自華州率所部兵擊之擒伏德斬思慶進屯渭橋會太祖軍進爵章武郡公太祖率諸將輔魏太子東征復以導爲大都督華東雍二州諸軍事行華州刺史導治兵訓卒得定捍之方及大軍不利東魏軍追至稠桑知關中有備乃

退齊氏稱帝太祖發關中兵討之拜大將軍大都督三雍二華等
二十三州諸軍事屯咸陽導性寬明善於撫御臨事敬慎常若弗
及深為吏民所附朝廷以此重之

周書本傳

猷字宣猷博陵人大統時遷京兆尹時婚姻禮嫁聚會之辰多舉
音樂又厯里富室衣服奢淫猷請禁斷事並施行恭帝元年周文
欲開梁漢舊路乃命猷督儀同劉道通等五人開通車路鑿山堙
谷五百餘里至于梁州即以猷為都督梁州刺史周文崩始利沙
興等州阻兵為逆信合開楚四州亦叛惟梁州人無二心利州刺
史崔士謙請援猷遣兵六千赴之信州糧盡猷送米四千斛於是

二鎮獲全

北史崔挺傳

盧光字景仁范陽涿人大統中歷位京兆郡守郡舍先是數有妖怪
前後郡將無敢居者光曰吉凶由人妖不妄作遂入居之未幾光

所乘馬忽升廳事登牀南首而立食器無故自破光不以介懷其
精誠守正如此

北史盧
同傳

鄭道邕字孝穆滎陽開封人幼謹厚清約涉歷經史孝武西遷從入
關大統中行岐州刺史在位有能名先是所部百姓久遭離亂逃
散殆盡道邕下車之日戶止三千留情撫綏遠近咸至數年之內
有四萬家考績為天下最周文賜書嘆美之徵拜京兆尹

北史鄭
義傳

柳檜字季華解人性剛簡任氣大統中從大將軍王雄討上津魏興
平之即除魏興華陽二郡守安康人黃衆寶謀反連結黨與攻圍
州城乃相謂曰嘗聞柳府君勇捍其鋒不可當今既在外方為吾
徒腹心之疾不如先擊之遂圍檜郡城卑下士衆寡弱又無守禦
之備連戰十餘日士卒僅有存者力屈城陷遂為賊所獲既而衆
寶等進圍東梁州乃縛檜置城下欲令檜誘說城中檜大呼曰

賊烏合糧食已罄行即退散各宜勉之衆竇大怒乃臨檜以兵曰
速更汝辭檜守節不變遂害之棄屍水中城中人皆爲之流涕衆
竇解圍之後檜兄子止戈方收檜屍還長安贈東梁州刺史周書本傳
宇文深字奴于性鯁正大統中歷東雍州別駕使持節大都督東雍
州刺史爲政嚴明示民以信抑挫豪右吏民懷之周書宇文測傳

于謹字思敬河南洛陽人周文帝臨夏州以謹爲防城大都督兼夏
州長史謹言於周文曰關右秦漢舊都古稱天府今若據其要害
招集英雄足觀時變且天子在洛逼迫群兇若陳明公之懇誠請
都關右然後挾天子而令諸侯千載一時也太祖大悅會有敕追
謹爲關內大都督謹因進都關中之策魏帝西遷授北雍州刺史
大統十二年率兵鎮潼關加授華州刺史魏恭帝元年除雍州刺

史天和二年授雍州牧三年薨諡曰文謹子實字賓寔天和二年

延州蒲川賊郝三郎反攻丹州遣實率衆討平之斬三郎首獲雜

畜萬餘頭除延州刺史

周書本傳

劉亮中山人周文時爲東雍州刺史爲政清靜百姓安之

北史本傳

庾信字子山南陽新野人拜洛州刺史信多識舊章爲政簡靜吏民

安之

周書本傳

高琳字季珉其先高句麗人大統初平西將軍三年從太祖破齊神

武于沙苑武成初除延州刺史從豆盧寧討稽胡郝阿保劉桑德

等破之

周書本傳

豆盧寧字永安昌黎徒何人大統中拜北華州刺史在州以廉平著

稱加散騎常侍從于謹破稽胡帥劉平伏于上郡武成初爲同州

刺史復督諸軍討稽胡郝阿保劉桑德等破之軍還遷大司寇

定四年授岐州刺史屬大兵東討興疾從軍五年薨於同州

周書本傳

遷奚武字成興代人保定三年為同州刺史時屬天旱高祖勅武祀

華岳岳廟舊在山下常所禱祈武謂僚屬曰吾備位三公不能燮

理陰陽使盛農之月久絕甘雨忝寄既重憂責實深必須登峯展

誠尋其靈輿岳既高峻人跡罕通武年踰六十將數人攀援得上

於是稽首祈請陳百姓懇誠晚不得還即於岳上藉草而宿夢見

一白衣人來執武手曰快辛苦甚相嘉尚武驚覺益用祇肅俄而

澍雨遠近霑洽高祖聞之璽書勞武子震字猛畧武平初除華州

刺史導民訓俗頗有治方秩滿還朝為百姓所戀

周書本傳

梁臺字洛都長池人大統十五年拜南夏州刺史保定五年拜鄜州

刺史性疏通恕已待物至於治民處政尤以仁愛為心

周書本傳

宇文慶洛陽人周武帝詔以行軍總管擊延安反胡平之拜延州總

管隋書本傳

衛元字文昇洛陽人周武帝時攝內史事領京兆尹稱為強濟北史本傳

韓果字阿六拔代武川人天和初授華州刺史為政寬簡吏人稱之

北史本傳。按周隋並置諸州總管刺史自應在總管下而隋書百官志云總管刺史加使持節故並入節鎮

陸逞字季明吳郡人天和四年除京兆尹郡界有豕生數子經旬而

死其家又有獷遂乳養之諸豚賴之以活時論以逞仁政所致北史

陸通傳

楊纂廣寧人慷慨有志畧授岐州刺史保定元年除隴州刺史天和

六年進柱國大將軍轉華州刺史纂性質樸蒞職但推誠信吏人

懷之北史本傳

宇文椿字乾壽建德初除岐州刺史四年關中民饑椿表陳其狀

書勞慰因令所在開倉賑恤周書本傳

齊睿字特德安定烏氏人周武帝時歷數州刺史有惠政隋書本傳

王慶字興慶太原祁人保定中歷丹中二州刺史為政嚴肅吏不敢

欺大象元年除延州總管周書本傳

偉字子直滎陽開封人天和六年轉華州刺史蒞職以威猛為政

吏人莫敢犯禁盜賊休止周書本傳

王世遵為邠州刺史性清約推誠化導百姓樂之周書本傳

亦朱敬字乾羅秀容契胡人高祖受禪拜金州總管號為明肅民吏

懼之隋書本傳

李和朔方巖綠人少勇敢有識度為州里所推賀拔岳鎮關中引和

帳內都督後從周文累遷夏州刺史保定二年除司憲中大夫尋

出為洛州刺史和前在夏州頗留遺惠及有此授商洛父老莫不

想望德音和至州以仁恕訓物獄訟簡靜進柱國大將軍開皇元年遷上柱國和立身剛簡老而愈勵二年薨諡曰肅

北史本傳

梁彥光字修芝安定烏氏人高祖受禪以為岐州刺史甚有惠政嘉

禾連理出于州境開皇二年上幸岐州悅其能賜粟五百斛物三

百段御傘一枚未幾又賜錢五萬彥光在岐州數歲其俗頗質以

靜鎮之合境大化奏課連最為天下第一

隋書本傳

柳機河東解人周宣帝時拜華州刺史高祖踐阼徵為納言復出為

華州刺史前後作牧俱稱寬惠

隋書本傳

弘度字摩阿衍博陵安平人開皇初拜華州刺史弘度御下嚴急

吏人讐氣所在之處令行禁止盜賊屏跡

隋書本傳

王智積高祖弟整之子授同州刺史以修謹聞聽政之暇端坐讀

門無私謁有侍讀公孫尚儀山東儒士府佐楊君英蕭德言

有文學時延於坐所設唯餅果酒纔三酌其簡靜如北開皇二十

年徵還京第

隋書本傳

周羅喉字公布九江潯陽人歷幽州刺史有能名

北史本傳

辛彥之隴西狄道人後入關遂家京兆高祖時遷洛州刺史有惠政

開皇十一年卒官謚曰宣

隋書本傳

唐

劉師立宋州虞城人太宗詔檢校岐州都督上書請討吐谷渾未報

即遣使間諭部落多降附者列其地爲開橋二州又党項酋拓拔

赤辭先附吐谷渾倚險自守亦遣說下之以母喪解岐人表留遂

不得赴哀時河西党項破丑氏嘗苦邊又阻新附師立討之軍未

至破丑懼遁去

唐書本傳

長孫祥河南洛陽人無忌從父兄安世子

舊唐書長孫無忌傳

祥永徽六年爲

雍州長史奏言鄭白渠為富商大賈競造碾磴堰遏漕水於是遣

祥毀之得水田六千餘頃

賈志○按長史即京兆尹永徽中改見唐書百官志

王方翼字仲翔并州祁人永淳初以功遷夏州都督屬牛疫民廢田作方翼為耦耕法張機鍵力省而見功多百姓順賴明年召方翼

議西域事引見奉天宮賜食俄而妖賊白鐵余以綏州反詔方翼

討之飛擄擊賊火其柵平之封太原郡公

唐書本傳

婁師德字崇仁鄭州原武人天授初為檢校豐州都督率士屯田積

穀數百萬兵以饒給無轉饟和糴之費武后降書勞之

唐書本傳

薛季昶絳州龍門人為雍州長史威名甚著前後京尹無及之者

冊府

元龜

張嘉貞猗氏人歷梁州都督政以嚴辦吏下畏之奏事京師元宗善

其政數慰勞

唐書本傳

張暉進京兆尹以幹治稱

唐書王琚傳

朱璟邢州南和人京兆人權梁山謀逆勅河南尹王怡馳傳往按牢械充滿久未決乃命璟爲京兆留守覆其獄初梁山詭稱婚集多假貸欲併坐貸人璟曰婚禮借索大同而狂謀率然非所防億使知而不假是與爲反貸者弗知何罪之云平縱數百人

白孔六帖

張說字道濟洛陽人元宗朝朔方軍大使王唆誅河曲降虜阿布思也九姓同羅拔野固等皆疑懼說持節從輕騎二十直詣其部宿帳下召見酋豪慰安之由是九姓遂安唆後討蘭池叛胡康待賓詔說經畧時党項羗亦連兵攻銀城說將步騎萬人出合河關擊破之羗胡自相猜夜鬪待賓遁餘衆奔潰說招納党項使復故處副使史獻請盡誅之說不從奏置麟州以安羗衆召拜同中書門下三品明年詔爲朔方節度大使親行五城督士馬時慶州方渠

降胡康願子反掠牧馬出塞說進討至木槃山擒之俘獲三千乃議徙六州殘胡五萬於唐鄧間空河南朔方地以功賜實封三百

戶

唐書本傳

裴耀卿開元初累遷長安令長安舊有配戶和市之法百姓苦之耀卿到官一切令出儲蓄之家預給其直遂無姦僭之弊公私甚便在職二年寬猛得中及去官縣人思詠之二十年冬遷京兆尹明年秋霖雨害稼京城穀貴上將幸東都召耀卿問救人之術耀卿對曰大駕東巡百司扈從太倉及三輔先所積貯且隨見在發重臣分道賑給可支一二年從東都更廣漕運以實關輔待稍充實車駕西還即事無不濟上深然其言

舊唐書本傳

信字弘正

耀卿孫

第進

士授藍田尉德宗詔發畿縣民城奉天嚴郢為京兆政刻急本曹

尉韋重規妻乳且疾不敢免佶請代役當時稱其義

唐書裴耀卿傳

源乾曜臨漳人元宗東幸以京兆尹留守京師治尚寬簡人安之居

三年政如始至伏內白鷹因縱失之詔京兆督捕獲於野絰瘞死

吏懼得罪乾曜曰上仁明不以畜玩寘罪苟其獲戾尹專之遂入

自劾失旨帝不問衆服其知體而善引咎

唐書本傳

峴吳王恪孫折節下士長于吏治天寶時累遷京兆尹元宗歲幸溫

湯旬內巧供億以媚上峴獨無所獻帝異之峴為政得人心時京

師米翔貴百姓乃相與譱曰欲粟賤追李峴

唐書本傳

李叔明字晉閬州人本鮮于氏世為右族兄仲通天寶末為京兆尹

叔明擢商州刺史遷京兆尹長安歌曰前尹赫赫具瞻允若後尹

熙熙具瞻允斯

唐書本傳

崔光遠靈昌人累遷京兆少尹元宗西狩詔留光遠為京兆尹西京

留守採訪使乘輿已出都人火左藏大盈庫至乘驢入宮殿光遠

募官攝府縣斬十數人乃定因僞使其子東見祿山祿山授光遠
故官俄而同羅背賊以廐馬二千出奔賊將孫孝哲安神威招之
不得官吏驚走獄囚皆逸光遠與長安令蘇震出開遠門使人奔
呼曰尹巡門門兵具器仗迎謁至皆斬之募得百餘人遂趨靈武
肅宗嘉之拜御史大夫復為京兆尹遣募僑民會賊黨剽涇陽椎
牛呼飲光遠刺知之率兵夜趨其所使百騎鼓滿狙其前驍士合
噪賊醉不能師斬其徒二千得馬千俘一酋長以獻自是賊常避
其鋒肅帝還改禮部尚書乾元初又徙鳳翔尹先是岐隴賊郭愔
等掠州縣光遠至諭降之

唐書
本傳

李齊物肅宗乾元中歷鳳翔京兆尹清廉自飭人吏莫敢抵犯

冊府
元龜

劉晏字士安南華人歷隴華三州刺史尋入為京兆尹委府事於司

錄張群杜亞綜大體議論號為稱職

舊唐書
本傳

魏少游字少游鉅鹿人四爲京兆尹雖無赫赫名然善任人緣飾規

檢有足稱者

唐書本傳

羅珣會稽人爲奉天令中官出入係道吏緣以犯禁珣榜笞之雖死不置自是屏息再遷京兆尹請減平糴半以常賦充之人賴其利

唐書本傳

嚴郢字叔敖華陰人及進士第代宗初郭子儀表爲關內河東副元帥府判官行軍司馬子儀鎮邠州檄郢主留務河中士卒不樂戍邠多逃還郢取渠首尸之乃定大曆末拜京兆尹嚴明持法盜賊一衰減隸官匠數百人號稱職宰相楊炎請屯田豐州發關輔民鑿陵陽渠郢習朔邊病利即奏發關輔浚渠營田擾而無利炎惡異已諷御史張著劾郢繫金吾長安中日數千人遮建福門訟郢冤帝知之出爲費州刺史歲餘卒

唐書本傳

白孝德安西人累功至北庭行營節度使徙邠寧僕固懷恩引吐蕃兵入寇孝德擊敗之永泰初吐蕃回紇圍涇陽郭子儀說回紇約盟吐蕃退走子儀使渾瑊以兵五千出奉天命孝德應之大戰赤

沙烽斬獲甚衆

唐書李光弼傳

渾瑊本鐵勒九姓之渾部善騎射勇常冠軍遷中郎將擢朔方行營兵馬使從郭子儀擊吐蕃邠州留屯邠虜復入至奉天瑊戰漠谷有功周智光反子儀令瑊以步騎萬人下同州智光平以邠寧隸朔方軍瑊屯宜祿大曆七年吐蕃深入與鹽州刺史李國臣趨秦原吐蕃引去瑊邀擊破之悉奪所畧而還領邠州刺史吐蕃入方渠懷安瑊擊走之子儀入朝留知邠寧慶兵馬後務德宗析所部爲三節度以瑊兼綏銀麟勝州節度副大使帝狩奉天瑊率家人子弟以從授行在都虞候京畿渭北節度使朱泚兵薄城治攻

矢石四集王師乘城者皆凍餒賊但以忠義感率中矢自墮去血而戰愈勵乘輿狩山南賊以諸軍衛入谷口遷同平章事兼奉天行營副元帥乃率諸軍趨京師賊韓旻拒武功城破之遂屯奉天以西軍收咸陽泚平論功以賊兼侍中封咸寧郡王

唐書本傳

高固字黃岑從渾瑊屯朔方德宗在奉天固仍從賊賊突入門固引銳士長刀殺數十人曳車塞圍賊不能入封渤海郡王貞元十七年邠寧節度使卒邠軍劫固為帥固曰能聽吾言乃可徇曰母殺人母肆掠三軍皆悅帝亦念固功乃拜邠寧節度使固本宿將且

寬厚人皆安之

唐書本傳

游瓌靈武人始為郭子儀裨將累進邠寧節度留後奉天之狩游瓌以兵三千來赴有詔引軍屯便橋次泥泉與泚兵值游瓌還奉天泚兵躡攻之游瓌殊死戰乃解泚大治戰棚雲橋既而大噪攻

南雉游瓌曰是分吾力也趨北雉遣將郭詢郭廷玉以銳士三百
直出火其棚投薪於中風返棚皆燼賊氣沮諸將推游瓌赴難功
第一李懷光叛誘游瓌爲變游瓌白發其書帝嘉其誠問計將安
出對曰懷光怙亂今邠有張昕靈武有寧景璿河中有呂鳴岳振
武有杜從政潼關有李朝臣渭北有竇覲皆守將也陛下以其衆
與地授之罷懷光權而尊以元功諸將仰首各聽其帥彼安能亂
帝曰罷懷光而泚益張若何對曰陛下約士以不次之賞今貢賦
方至發而酬之其守自固邠有萬精甲臣得將之可以誅賊四方
杖義而起賊不足慮帝美其言會帝幸梁州游瓌馳入邠說昕無
汙不義昕不聽游瓌結其將高固等殺昕以聞拜邠寧節度使
會渾瑊於奉天扼京西要險破泚兵咸陽京師平帝至自興元
功與瑊等皆第一貞元二年吐蕃圍鹽州刺史杜彥光約與之

吐蕃許之又取銀夏麟等州游瓌請收鹽州以斷戎人走集詔李

元諒韓令義率師會游瓌收鹽州後還京師卒諡曰襄

唐書本傳

戴休顏夏州人家世尚武郭子儀引為大將諭平党項羗進封咸寧

郡王兼朔方節度副使城邠州功最遷鹽州刺史朱泚反率兵奔

問行在與渾瑊等扞禦有勞帝進狩梁洋留守奉天李懷光屯咸

陽使人誘之休顏斬其使勒兵自守遷奉天行營節度使合渾瑊

兵破泚追至中渭橋京師平又與瑊率兵趨岐陽邀泚殘黨加檢

校尚書右僕射

唐書本傳

向可孤鮮卑別種上元中自賊所歸使將兵三千屯扶風武功歷十

餘年隊伍閑整朱泚之難可孤壁七盤偽將仇敬忠等來寇擊卻

之遂收藍田德宗將遷梁州命引兵守灊上拜神策京畿渭南商

州節度招討使敬忠拒戰可孤急擊斬之進軍與李晟收長安為

光鋒又會諸軍進討李懷光次沙苑卒於軍

唐書本傳

李晟字良器隴右臨洮人興元元年朱泚盜據京城懷光圖爲反噬德宗幸山南三月加晟檢校右僕射兼京畿渭北鄜坊丹延節度招討使四月加晟京畿渭北鄜坊商華兵馬副元帥晟于畿甸率聚征賦吏民樂輸守禦益固五月三日引軍抵通化門移書渾瑊駱元光尚可孤尅期進軍城下其月二十五日夜晟自東渭橋移軍於光泰門外米倉村以薄京城晟臨高指麾令設壕柵以候賊軍俄賊衆大至逼柵求戰晟勒吳詵康英俊史萬頃孟涉等縱兵擊之時華州營在北兵少賊併力攻之晟遣李演孟華以精卒救之中軍鼓譟演力戰大破之乘勝入光泰門再戰又敗之餘衆走入白華二十八日晟大集諸將陳兵于光泰門乃使王佖李演率騎軍史萬頃領步卒直抵苑牆神麋村先是夜使人開苑牆二

餘步至是賊已樹木柵之賊倚柵拒戰晟叱軍士曰安得縱賊
此當先斬公等萬頃俱先登拔柵而入王佖騎軍繼進賊即奔潰
獲賊將段誠諫大軍分道並入鼓譟雷動姚令言張庭芝李希倩
猶力捍官軍晟令決勝軍使唐良臣兵馬使趙光鈺楊萬策孟日
華等步騎齊進賊軍陣成而屢北戰十餘合乘勝驅蹙至於白華
忽有賊騎千餘出於官軍之背晟以麾下百餘騎馳之左右呼曰
相公來賊聞之驚潰官軍追斬不可勝計朱泚姚令言張庭芝尚
有衆萬人相率遁走晟遣田子奇追之其餘兇黨相率來降是日
晟軍入京城乃遣京兆尹李齊運攝長安令陳元衆攝萬年令韋
上俊告諭百姓居人安堵秋毫無所犯遠坊居人有經宿方知者
七月十三日德宗至自興元晟以戎服謁見於三橋上駐馬勞之
製紀功碑刊石立於東渭橋詔以晟兼鳳翔尹鳳翔隴右節度使

初帝在奉天鳳翔軍亂殺其帥張鎰立小將李楚琳八月晟至鳳翔理殺張鎰之罪斬王斌等十餘人貞元二年九月吐蕃用尚結贊之計乃大興兵入隴州抵鳳翔無所虜掠晟先令衙將王伋選銳兵三千設伏于汧陽誠之曰蕃軍過城下勿擊首尾首尾縱敗中軍力全若合勢攻汝必受其弊但俟其前軍已過見五方旗武豹衣則其中軍也突其不意可建奇功伋如晟節度果遇結贊及出奮擊賊皆披靡伋軍不識結贊故結贊僅而獲免

舊唐書本傳

嚴震字遐聞梓州鹽亭人山南西道節度府表爲鳳州刺史母喪解起爲興鳳兩州團練使好興利除害劍南黜陟使韋棹狀震治行爲山南第一進封鄖國公治鳳十四年號稱清嚴遠邇咨美遷山南西道節度使朱泚反遣穆延光遺書誘之震即斬以聞時奉天危蹙帝欲徙蹕山南震馳表奉迎既至梁州宰相以爲地貧無所

仰給請幸成都震曰山南密邇畿輔李晟銳於收復方藉六師爲聲援今引而西則諸將顧望責功無期會晟表至亦請駐蹕梁洋議遂定然梁漢雖領十五郡賦入纔比東方數大縣自安史後山賊剽掠戶口流散震隨宜勸課鳩歛有法民不煩擾而行在供億具焉車駕將還加檢校尚書左僕射詔改梁州爲興元府即用震爲尹久之進同中書門下平章事卒諡忠穆

唐書本傳

崔縱博陵安平人授藍田令德化大行縣人立碑頌德後德宗出奉天遷京兆尹上言懷光反覆不情宜備之及帝徙梁州追扈不及左右短縱素善懷光殆不來帝曰知縱者朕也非爾輩所及後數

日至

唐書崔元暉傳

杜希全京兆醴泉人以裨將隸郭子儀積功至朔方節度使軍令整嚴士畏其威奉天之狩希全引兵赴難次漠谷爲賊邀擊還保邠

州賊平遷檢校尚書左僕射靈鹽豐夏節度使封餘姚郡王將即
屯獻體要八章砭切政病帝嘉納賜君臣箴一篇尋兼夏綏銀節
度都統建言鹽州據要會爲塞保郭自陷於虜靈武勢縣鄜坊單
逼爲邊深患請復城鹽州乃詔朔方邠寧銀夏鄜坊諸節度合選
士三萬五千屯鹽州又敕涇原劍南山南軍深入吐蕃撓其力使
不得犯塞執築凡六千人閱二旬畢希全居河西久頗橫肆帝數
容掩其短卒贈司空

唐書
本傳

郭君牙瀛州樂壽人初李晟以君牙爲都將德宗出奉天晟率君牙
赴難徙屯渭橋軍中便宜唯君牙得豫晟在鳳翔數行邊常以君
牙守晟入朝代爲鳳翔觀察使俄領節度檢校尚書右僕射吐蕃
歲犯邊君牙勸耕講戰以爲備戎不得侵又城隴州平戎川號水

信城卒官贈司空

唐書
本傳

張獻甫

陝州河北人

李懷光叛吐蕃盜邊獻甫領禁兵戍咸陽累年兵農

悅安貞元四年代韓游瓌領邠寧節度使斷山浚塹選巖要地築

烽堡請復鹽州及洪門洛原鎮屯兵遣兵馬使魏范逐吐蕃築鹽

夏二城虜衆不敢入寇

唐書本傳

柳晟河中解人朱泚反從帝至奉天自請入京師說賊黨以携之帝

壯其志得遣泚將郭常張光皆晟雅故晟出密詔陳禍福順逆常

奉詔約自拔歸朱既昌告其謀泚捕繫獄晟夜半坎垣毀械亡歸

奉天帝見爲流涕乘輿還京師累授山南西道節度使府兵討劉

闢還未扣城復詔戍梓州軍曹怒謀變晟聞疾驅入勞問曰若等

何爲成功曰誅驕不受命者晟曰若知劉闢得罪天子而誅之奈

何復欲使後人誅若等耶士皆免胄拜從所從

唐書本傳

鄭叔則德宗貞元初爲京兆尹奏射生神策及六軍將士准三月二

十一日勅如有關府縣須其辨對者先具奏聞然後移牒本軍不得懸有追捕伏以浩穰之地姦慝不嘗小失隄防恐難懲肅其婚田常務即請准勅處分其盜賊鬪毆及姦偽等若待奏報恐失罪人請以時追捕具狀申奏從之○李克爲京兆尹德宗下制百司及府縣有於禁門內諸司追召人鞠問者宜先奏聞於是克奏府縣庶務訐鞠繁細若悉以聞奏既黷天聽且失罪人其賊盜奸犯擄蒲鬪毆誘人妻妾債人財物及相訐告者請仍舊追鞠從之

元龜

樊澤字安時河中人舉賢良方正上第召對延英殿德宗歎其論兵與我意合累遷山南東道司馬就拜節度使每射獵諸將憚其材武貞元二年爲荆南節度使會山南東道嗣曹王臯卒軍亂剽居人以澤威惠著襄漢間復徙山南東道加檢校尚書右僕射十四

年卒

唐書本傳

高崇文少籍平盧軍貞元中從韓全義鎮長武城治軍有聲吐蕃寇寧州崇文率兵三千往救戰佛堂原大破之全義入朝留知行營節度後務遷長武城都知兵馬使劉闢反俾統左右神策麟游奉天諸屯兵討闢闢走追禽之詔同中書門下平章事邠寧慶節度使爲京西諸軍都統居邠三年戎備整脩

唐書本傳

吳湊濮州濮陽人貞元十四年春夏旱穀貴人多流亡京兆尹韓皋以政事不理黜官上召湊面授京兆尹即日令視事湊以勤儉爲務人樂其政時宮中選內官買物於市倚勢強買人畏而避之呼爲宮市掌賦者多與中貴人交結假借不言其弊湊論之曰宮中所須責臣可辦不必更差中使若以臣外吏不合預聞宮中所須乞選內官年高謹重者充宮市庶息人間論議又奏掌閑曠騎飛

龍內園芙蓉及禁軍諸司等使雜供手力資課太多量宜減省上
多從之初府掾吏以湊出自戚藩不諳簿領凡有疑事多候湊將
出時方呈湊雖倉卒閱視必指其姦倖之處決斷無毫釐差掾吏
非大過不行笞責按問詰責而釋之吏尤惕厲庶務咸舉文敬太
子義章公主相繼薨歿上追思塋送頗厚召集工役妨民農務湊
候上顧問極言之宗屬門吏以湊論諫太繁恐上厭苦每以簡約
規之湊曰上明哲憂勞四海必不以公主太子而忽疲民但人多
順旨不言若再三啟諫必動宸情則生民受賜議者重之以能政
兼兵部尚書官衙樹缺所司植榆以補之湊曰榆非九衢之玩至
命易之以槐及槐陰成而湊卒人指樹而懷之

舊唐書
本傳

裴玢五世祖糾本王疏勒武德中來朝留不去遂籍京兆玢初事論
惟明爲隸力從惟明鎮鄜坊署牙將後節度使王栖曜卒中玢

何朝宗作亂玢擒朝宗斬之同州刺史劉公濟領節度擢玢為司

馬公濟卒授玢節度使元和三年徙山南西道玢為治嚴稜畏遠

權勢不務貢奉疏食布衣取避風雨倉庫完實百姓安之當世將

帥未有及者諡曰節

唐書本傳

顧少連字彛仲蘇州吳人舉進士歷京兆尹政尚寬簡不為灼灼名

先是京畿租賦薄厚不能一少連以法均之遷吏部尚書

唐書本傳

李鄘字建侯江夏人舉進士順宗登極遷京兆尹元和初以京師多

盜復選為京兆尹擒奸禁暴威望甚著

舊唐書本傳

王璠字魯玉元和初舉進士宏辭遷京兆尹自李諒後政條隳斁茲

豪寢不戢璠頗脩舉有名

唐書本傳

王播字明敷太原人舉賢良方正補藍屋尉善治獄李實為京兆尹

表為三原令邑中豪強犯法未嘗輒貸歲終課最歷京兆尹

唐書本傳

王播元和五年為京兆尹時禁軍諸鎮布列畿內軍人出入屬鞬佩劍往往盜發難以擒姦播奏請畿內軍鎮將卒出入不得持戎具諸王駙馬權豪之家不得於畿內試鷹犬畋獵之具詔從之於是姦豪弭息冊府元龜

李惟簡本范陽內屬奚憲宗時為鳳翔節度使市牛佃具給農歲增墾數十

萬畝唐書本傳

韓愈字退之鄧州南陽人唐書本傳為京兆尹六軍不敢犯法私相謂曰

是尚欲燒佛骨何可犯耶通鑑

崔從字子义齊州全節人為山南西道節度使長慶初領鄜坊節度屬部

多神策屯軍數亂法驕橫吏不能制從一繩以法下皆畏之党項

互市羊馬類先遺帥守從獨不取而厚慰待之羗不敢盜境

傳

元承宗弟有沉謀穆宗詔徙鄜坊丹延節度俄徙鳳翔鳳翔在

襄涇原地平少巖險吐蕃數入盜承元據勝地為鄆置守兵千詔

號臨汧城府郭左百賈州聚異時為虜剽敝承元版牒繚之人乃

告安以功封岐國公

唐書本傳

劉栖楚為京兆尹峻誅罰不避權豪先是諸惡少竄名北軍凌籍衣

冠有罪則逃軍中無敢捕栖楚一切窮治不閱旬宿奸老蠹為斂

迹一日軍士乘醉有所凌突諸少年從旁譟曰癡男子不記頭上

尹耶

唐書本傳

栖楚與屬吏言未嘗傷氣嘗謂府縣僚曰諸公各自了

本分公事晴天美景任恣意遊賞勿致拘束

因話錄

李絳字深之系本贊皇元和十年為華州刺史吐突承璀田多在部

中主奴擾民絳捕繫之會遣五坊使帝戒曰至華宜自戢絳大臣

有奏即行法矣州有捕鷄戶歲責貢限絳以為言并勸止畋獵有

詔澤潞太原天威府并罷之文宗立以檢校司空爲山南西道節度使四年南蠻寇蜀道詔絳募兵往赴兵還監軍使楊叔元素疾絳遣人迎說曰將收募直而還爲民士皆怒譟而入絳方宴不設備遂握節登陴或言縋城可免絳不從牙將王景延力戰歿絳遂遇害幕府趙存約薛齊皆死事聞絳贈司徒謚曰貞景延亦贈官

唐書

本傳

溫造字簡與并州祁人興元軍亂殺李絳衆謂造可夷其亂文宗授山南西道節度使許以便宜從事興元將衛志忠張丕李少直自蜀還造喻以意乃以八百人自從五百人爲前軍旣入前軍呵護諸門造至欲大宴視廳事曰此隘狹不足饗士更徙牙門坐定將卒羅拜勞問畢就坐酒行從軍合卒有覺者欲引去造傳言叱之乃不敢動即問軍中殺絳狀志忠丕夾階立拔劍傳呼曰

兵爭奮皆斬首親殺絳者醢之號令者殊死取百級祭絳三

級祭死事官以功加檢校禮部尚書賜萬縑賞其兵子璋以父

累官邠寧節度歷京兆尹璋素強幹豪右帽服同昌公主薨懿宗

誅醫無狀者繫親屬三百餘人璋極諫貶

唐書溫大雅傳

戢字方舉

孔子三十世孫

授京兆尹歲旱文宗憂甚戢躬祠曲江池一

夕大澍帝悅詔兼御史大夫

唐書孔巢父傳

福

襄邑恭王神符五世孫字能之太和中第進士調藍田尉後石當國薦福

任治人時黨項羗震擾議擇儒臣治邊乃授福夏綏銀節度使宣

宗臨軒諭遣福以善政聞僖宗初拜山南東道節度使王仙芝寇

山南福圍練鄉兵邀險須之賊不敢入

唐書李石傳附

韋長文宗太和末為京兆尹奏准勅天下州府犯輕罪除情狀巨蠹

者其他過誤及尋常公事違犯不得鞭背者伏以京師浩穰姦豪

所聚終日懲罰牴犯猶多小有寬容即難禁戢若恭守勅旨則無以肅清若臨事用刑則有違詔命伏望許依前據輕重處置從之

冊府元龜

張仲方

韶州曲江人

貞元中進士補金州刺史宦人奪民田仲方三疏申

理卒與民直李訓之變召仲方曰有詔可京兆尹時族夷將相體足旁午仲方皆密使識其尸俄許收塋故齒骸不相亂已而禁軍多撓政仲方不能有所繩劾更以薛元賞代之

唐書張九齡傳

薛元賞開

成初為京兆尹奏京城豪猾素難禁戢自去冬後益恣兇狂假託

軍司劫掠坊市伏望自去年十一月後府縣所繇及坊市百姓投

名諸軍諸使諸司悉令解還府縣冀得畿內寧止輦下清肅許之

冊府元龜

元賞會昌中拜京兆尹都市多俠少年以黨墨鏡膚誇詭力

剽劫坊閭元賞到府三日收惡少杖死三十餘輩陳諸市餘

爭以火滅其文元賞長吏事能推言時弊禁屯怙勢擾府縣元賞

數與爭不少縱由是軍暴折戢百姓賴安

唐書本傳

王起字舉之

太原人擢進士舉賢良方正異等

補藍田尉累遷山南東道節度使濱

漢塘堰聯屬吏弗完治起至部先脩復與民約為水令遂無凶年

武宗立擢山南西道節度使同平章事

唐書王播傳

盧鈞字子和系出范陽徙京兆藍田舉進士中第從李絳為山南府

推官調長安尉拜華州刺史關輔驛馬疲耗鈞為市健馬率三歲

一易自是無乏事會昌中拜山南東道節度使武宗以鈞寬厚能

得衆詔兼節度昭義軍大中九年為山南西道節度使鈞居官必

有績大抵根仁恕至誠而施于事位將相沒而無贏財

唐書本傳

田牟

平州人

寬厚明吏治開成初鹽州刺史王宰失羗人之和詔牟代

之累鄜坊節度使

唐書田弘正傳

崔珙博陵安平人開成二年六月遷京兆尹是歲京畿旱珙奏漕水入內者十分量減九分賜貧民溉田從之

舊唐書本傳

鄭澣

鄭州滎陽人

餘慶子第進士累進尚書左丞出為山南西道節度使

始餘慶在興元創學廬澣嗣完之養生徒風化大行

唐書鄭餘慶傳

畢誠字存之

偃師人

黃門監構從孫舉進士為學士党項擾河西宣宗

嘗召訪邊事誠援質古今條破羗狀甚悉帝說拜邠寧節度河西供軍安撫使誠到軍遣吏懷諭之人皆順向時戍兵常苦調饟之

誠募士置屯田歲收穀三十萬斛以省度支經費詔書嘉美

唐書本傳

鄭畋字台文系出滎陽為鳳翔隴西節度使募銳兵五百號疾雷將

境中盜不敢發發輒得會黃巢陷東都遣兵戍京師以家財勞行

妻自紆戎衣給戰士帝出梁洋畋上謁斜谷泣請便宜從事當以

死報國畋還蒐士卒繕器械濬城隍以逆順曉諸將刺血以盟

和元年賊將王璠率衆來攻畋設伏以待殺賊二萬級璠遁去畋傳檄天下遠近咸聳各思立功奔問行在巢大懼不敢西謀再進

司空兼門下侍郎京城四面行營都統

唐書本傳

蕭廩字富侯第進士廣明初遷京兆尹田令孜養子有罪捕吏繫獄

請救踵門廩不納杖之内外畏讐

唐書蕭瑀傳

五代

牛存節字輦正青州博昌人太祖即位遷鄜州留後同州劉知俊叛

奔鳳翔乃遷匡國軍節度使友珪立朱友謙叛附於晉西連鳳翔

存節東西受敵同州水鹹而無井友謙與岐兵合圍持久欲以渴

疲之存節禱而擇地鑿井八十水皆甘可食友謙卒不能下末帝

立加同中書門下平章事

五代史本傳

徐懷玉爲鄜州節度使材氣剛勇臨陣未嘗折退平生金瘡被體有

戰將之名

冊府元龜

懷玉亳州焦夷人少事梁太祖天復四年遷華州

觀察留後以兵屯雍州拜保大軍節度使太祖崩朱友謙附於晉

襲鄜州執懷玉殺之

五代史本傳

霍彥威字子重洛州曲周人事梁太祖拜邠寧節度使李茂貞遣梁

叛將知俊攻邠州彥威固守踰年每獲知俊兵必縱還之知俊德

之後不復攻

五代史本傳

唐道襲梁山南西道節度使會李茂貞寇蜀道襲於青泥嶺以死守

之茂貞自是無窺山南之意

馬志

李從暉深州博野人同光三年拜鳳翔節度使從暉有田千頃竹千

畝在鳳翔懼侵民利未嘗省理鳳翔人愛之廢帝起鳳翔將行鳳

翔人叩馬乞從暉廢帝入立復以從暉爲鳳翔節度使卒

五代史李茂貞

傳

楊彥詢字成章河中賓鼎人拜安國軍節度使天福七年徙鎮鎮國

遭歲大饑爲政有惠愛

五代史本傳

折從阮字可久雲中人唐莊宗以爲府州刺史晉出帝與契丹敗盟

從阮以兵攻契丹取其城堡十餘遷本州團練使兼領朔州刺史

漢高祖入立於府州建永安軍以從阮爲節度使明年以其族朝

京師徙鎮武勝歷宣義保義靜難三鎮顯德二年卒

五代史本傳

王環鎮州真定人晉開運之亂秦鳳階成入於蜀孟昶以環爲鳳州

節度使周世宗遣王景向訓攻秦鳳數爲環所敗世宗乃決意攻

之秦成階相繼降環獨堅守百餘日然後克之世宗召見環嘆曰

三州已降環獨堅守吾數以書招之環不答至力屈乃就擒雖不

能死亦忠其所事也用之可勸事君者乃拜環右驍衛將軍

五代史本傳

傳

郭從義其先沙陁部人趙思綰之叛爲行營都部署賜戎裝器仗金帶至永興圍其城即以從義爲永興軍節度思綰糧盡城中人相食從義繫書矢上射入城中說思綰令降仍表于朝廷許以華州節制隱帝從其計即遣使諭思綰令開門納欵翊日從義具軍容入城憇候館中思綰入謁即令武士執之并其党三百餘人悉斬

于市

宋史本傳

